



Nachtschwärmer 2008



Dr Becker goot em Yakin uf e Wegger
Är findet sini Gritte „lecker“
Si blyybt bym Yakin, soowisoo, ganz sicher, jeedi Wett
Wil si jetz uusegfunde het, wär die greesseri Bälleli het



Die Gritte vom Nicolas Sarkozy
Ka`s blutt posiere nid lo sii
D`Franzoose, die finde das nid toll, beschimpfe sii als Ferkel
Mir zwai dängge, lieber die , als e blutti Angela merkel



Dr Armeechef Keckeis schryybt e Buech
Mit Styyre zaalt, das isch dr Fluech
Mir finde das zwoor nid so schlimm, mir bewundere dä Maa
Was uns am maischte gwunderet het, dass so aine schriebe kaa



S`voorletscht Joor, es isch brutal
Im Joggeli, bim Maischter-Final
Dert sind Fans uff d`Spiiler los, d`Spiiler händ sich beschwert
Mir finde`s um so komischer, in Thun isch`s umgekehrt



E aigene See in Minchestai
Dail saage joo, die andere nai
Dr FCB, isch dergeege, das isch ihres Creed
Bi jedem Match vom FCB, deent`s im Joggeli: Kai-See-doo



Mir sind zem Hotel Euler gange
Kum dert, scho stehn mir in dr Schlange
Die Lyt wänd Occasion-Meebel kaufe, um d'Woonig z'dekoriere
Mir wänd numme schlangestoo, um fir EURO 08 trainiere



An dr Euro 08, mir finde's logisch
Sind Meerwäg-Bächer obligatorisch
So Bächer, das isch wunderbar, kasch meermols bruuche und wäsche
Mir hoffe nur, bi dr Schwizer Nati, het's kaini Aiwäg-Fläsche



Bi de Waale im Herbscht, das isch e digge
Hän mir dr SVP-Zottel uf Bärn welle schigge
Dr Blocher het's nid luschtig gfunde und tobt vor Wuet im Grais
S'goot nur dr Beschti vo dr SVP, jä das wär denn ebe die Gaiss



Uf eme Gletscher, ganz ungeniert
Wärde blutti Mensche fotografiert
Am Schluss do gheit ain in e Loch, s'duet wee, är muess sich pfläage
Nur isch das nid e Gletscherspalte, dert isch dr Minou gläage



Organ-Spänder sii, das isch hit Moode
Härz, Lunge, Läbere und unseri Hoor
Mir frooge eich jetz, liebi Lit, mached doch au mit
Spändet wenigstens eier Darm, so dass es witerhin Klepfer git